

江
西
詩
徵

江西詩徵卷九十

南城曾煥賓谷編輯

釋子

克新

克新字仲銘號江左外史鄱陽人姓余氏襲公九世孫元末住嘉興水西寺洪武初召至南京奉詔往西域招諭吐蕃有雪廬南詢諸稿

次韻方推官感興

鴛湖風雨曉吹晴野曠天高秋氣清鳳詔早頒南國使龍旗新動朔方兵關河千里民初息吳越三年賦始輕戮力邦家戡禍難釣灘何處濯吾纓

江西詩徵

卷九十

釋子四

十一

達丞相承恩詞次張員外韻

金壺玉露逐皇華
黃土重封識內家
宴罷省門扶上馬
微風吹側帽簷花

名馬西來蹴雪濤
大奴重刷錦雲毛
也知不是尋常種
千騎中間獨爾高

題酸齊小像

拋却朝簪下九天
西湖風月一漁船
蘆花夢覺魚龍遠
又是人間五百年

題恢復初梅

雪消春色滿天涯
南北歧頭總著花
驛使不來歸路斷
海風吹月照江沙

次韻顧玉山題杭上人芭蕉

山寺春深積雨餘，坐看花影上階除。
新詩吟罷無人到，只向芭蕉葉上書。

次韻答唐伯剛斷事

平湖落日照漁汀，風起槎頭欲挂罾。
城上倚樓看明月，河東詞客小西僧。

題趙清獻公圖送趙知州

攜鶴歸來自蜀山，畫圖今復幾人看。
秋風江海旌旗遠，霜鬢蕭蕭鐵面寒。

隱居圖

戰馬多芻戰士肥，總拋蓬掖著征衣。
首陽商嶺無人到，幾

度春風老蕨薇

贈夏君美同知

十載中吳戰伐多使君談笑罷干戈
漢廷封拜論功爵羞殺南征馬伏波

岳飛墓次劉治中韻

西湖水色映陽阿偃月堂連瑪瑙坡
方擁貔貅驅塞外豈期鷹隼被虞羅
兩宮天遠嗟何及中土溝分恨轉多
異代英雄同感慨酒酣彈劍一悲歌

題山陰圖送別

杖藜何處訪幽居萬壑千巖一草廬
花發湖頭兵散後船回谿上雪飛初
風流遠挹蘭亭會靈祕窮探禹穴書
歌罷

陽關仍進酒隔江鞀鼓政愁予

送鐵尙書還朝兼簡危參政

臨遣皇華選上班尙書持節下天關江南王賦三年入海
上仙槎五月還奏疏紫雲開雉尾進圖紅日繞龍顏故人
鳳詔經綸久歲晚歸耕何處山

送日本城上人

浮海東來一葉身鷗波浩蕩孰能馴十年風雨南游楚萬
里關山西入秦書寄蕃航歸故國詩題蕭寺送青春誅茅
深入封禺底莫種桃花引世人

贈劉秀才

山之虎兮有爪如鐵馮婦搏之飲其血水之蛟兮有牙如

鉞周處斬之服其骨君既有才復有藝如何落魄風塵際
方今天子圖治惟賢求閭閻談笑皆封侯何不攜書奏之
蓬萊宮佩取金印如斗歸山東

茅山沈道士琅玕所

仙人種玉茅君山春風抽出青琅玕萬箇森森翳雲日下
有芝草長闌干九秋瓊露墮瑤海鳳凰夜栖毛羽寒仙人
時來琅玕下采芝斲玉和神丹丹成白晝上天去風鳴環
珮聲珊珊

壯丁行

去年差壯丁駕船下海討狂賊今年差壯丁荷戈遠戍河
南北去年行者秋已還今年去者無消息去年壯丁初發

時姑蘇驛前江水湄長鎗巨戟各在手椎鼓鳴鉦揚大旗
爺娘頓足妻招手號哭向天淚如雨陰風蕭蕭黃塵飛日
落哭聲猶未已近聞河北新戰平血流如海屍如城嗚呼
安得盡銷天下之甲兵鑄作農器驅民耕

次韻顧仲瑛遷居

畫舸載書隨早春平湖雪消楊柳新黃鵠九霄不可致白
鷗萬里誰能馴謝安自是廟堂器元亮本非邱壑人聖主
徵賢圖治急未容便作耕桑民

次韻答柳仲禮宣使

青袍白馬南蕃使解後江城三月初把酒流鶯啼別圃倚
樓飛絮落前除君趨大府才華盛我住空山禮法疎攜手

勿論鄉國士十年兵甲復何如

送石仲德司丞

戎馬生四郊避難去鄉國鄉國豺虎多十年歸不得游魚
潛舊淵飛鳥栖故林天地物尙爾我獨何爲心驅車戒遠
道君歸渺烟草歲寒冰雪深榮華及時保

送除上人之武林

雪花飛送浙江船歌斷驪駒一惘然荆棘銅駝淒暮雨樓
臺鐵鳳墮秋烟遶東鶴返塵生海石上人歸月在天回首
六橋楊柳外水光山色共晴川

送王尚書還朝兼簡張學士

文采丹山一鳳毛吳藩徵餽獨賢勞飛帆轉海南風正度

履趨廷北極高花擁御筵歌湛露香浮宮衾賜蒲萄朝回
爲報張燕國莫把新詩奪錦袍

赴慧日寺途中寄繆同知

舟楫南來處處過海隅東去奈愁何蓼花帶雨紅連渚黍
穗迎秋翠委波半日帆檣行柳末一天風月宿蘆科道逢
遺老詢時事惟說州侯惠愛多

渠水東邊海盡頭迷茫烟霧接高秋稗荒田野雞豚少湖
落汀沙魚鳥稠虛市殘民茅結宇空原枯骨草連邱重經
古寺談灰劫轉使孤懷增百憂

登姑蘇城

城上旌旗烟霧重樹頭初日出雲紅一溪鷗散桃花雨兩

岸鶯啼楊柳風邊塞鼓鞀終日振鄉關道路幾時通江南
春色渾依舊桑柘青青門巷空

自恢

自恢字復初豫章人元末住海鹽法喜寺洪武初
移居廬山

送海上人還荆門

徧禮南朝古佛宮荆岑春去百花濃江通楚蜀波濤壯山
入湖湘紫翠重拄杖穿雲隨白鹿軍持分水浴蒼龍欲知
後夜相思夢月落猿啼滿竺峯

題唐子華畫山水

江雲如雪樹高低竹裏人家傍水西滿地松陰春雨過好

山青似若耶溪

偶成

金沙溪上柳條齊
白鳥羣飛落照低
十里荷花紅勝錦
好山都在畫橋西

馬鞍山

馬鞍山西句吳東
山中佳氣長鬱葱
層巒起伏積空翠
芙蓉削出青天中
六丁夜半石壘壁
殿閣煌煌絢金碧
講師燕坐講大乘
虎來問法作人立
天花散雨裝羅樹
一聲其命雲深處
我時細讀孟郊詩
興來更上龍洲墓
憶昔曾同忠信友
七尺枯藤長在手
數年音問隨茫然
頓覺饑懷醉如酒
嗟彼習俗酣歡娛
錦鷲細馬紅氍毹
畫船吹笛擷大

鼓吳兒棹歌越女飲只今歌樂難再得面顏已帶風塵色
何如張宴溪上樓山光倒浸湖光白我愛虎頭金粟子千
載論交澹如水每懷故舊參與商二老到門驚復喜我留
玉山今卽歸天風泠泠吟客衣人生會合如夢寐焉能對
酒成吁噓我歌長歌若起舞山川信美非吾土褰裳涉澗
采昌陽且向山中作重午

題顧仲瑛漁莊

君家漁莊在何處江波迢迢隔烟霧清秋獨釣蘆花風明
月長歌白蘋渡高堂絲管延佳賓舉網得魚皆錦鱗小奴
鸞刀出素手金盤斫鱸如飛銀走也山林老釋子拄杖行
吟嗟未已平生雅有濠上游相思瀾瀾東流水

懷渭

懷渭字清遠號竹菴魏氏子南昌全悟法嗣洪武
初奉詔至鍾山退居錢塘有竹菴外集

畫梅

瑤臺夕承月玉砌曉凝霜花暎含章發枝橫禁籞長春風
似相識偏惜壽陽粧

折得江南春悵望洛陽客悠悠歲年暮浩浩風塵隔遠道
勿相思相思減容色

次孟天暉南山雜詠

賀監湖邊草色春秦淮江上柳條新山川是處堪行樂晴
日風光思殺人

暮春三月風日妍
亂折花枝送酒船
西嶺山光青浸水
南池柳色綠生烟

送仁一初上人遊武林

舞鳳飛龍若箇邊
天涯送遠獨凄然
江山南渡降王宅
風雨西陵過客船
踏雪馬塍春買樹
鬪茶龍井夜分泉
落花寂寞東歸日
烟嶼冥冥叫杜鵑

寫扇贈明上人

太湖六月暑氣微
龍宮佛屋相因依
蜃嘘翠霧作樓閣
蛟織冰綃鳴杼機
鐘磬無時空外發
笙簫幾處月中歸
投閒擬向上方住
共看滄波白鳥飛

太虛

太虛名紹郭樂平人通內典好吟詠縱遊三十年
歸住永寧寺士大夫咸禮之素戒飲洪武辛巳壽
八十三一日呼酒大酣取像題云云書已假寐而
化

題像語

這箇老僧有甚把鼻醜貌陵嶒開眼瞋睡須知父母未生
前本來面目知何似

黃半閒

黃半閒慧力寺僧洪武中召至京應制賦金陵春
曉詩稱旨賜紫金襴袈裟歸

金陵春曉

五雲深鎖鳳凰城海宇清寧旦氣平錦繡山河霞彩動金
銀宮闕日華明御溝垂柳雙鶯轉官道飛花萬馬鳴試向
西虹橋上望分明遐想接蓬瀛

似杞

似杞字楚材鄱陽人受知明太祖洪武初還饒之
永福寺御製詩送之

題米元暉山水小景贈陳原貞別

江頭雨足春水生江上青山烟樹暮扁舟明發去如飛目
斷征帆入蒼霧

昌國寺畱題

往歲曾來昌國寺題詩終日倚闌干雲橫冠冕晴堪畫春

漲琵琶晚好看如此山川天下少向來樓殿雨中寒重尋
茶竈登臨處烟草萋迷思萬端

登昌國寺絕頂看琵琶洲

白雲城上晚霞晴照見琵琶洲渚清素練平鋪秋色淨霜
鷗亂點浪花明柳根茅屋如壺大沙際漁舟勝葦輕山寺
歸來燈火夕坐依庭樹月三更

法住

法住豫章人號幻菴又號雲峯得法於蒲菴復公
次韻答劉克勤

老來軒冕不須期還慕林泉歲月遲雙眼長青惟愛客滿
頭都白苦緣詩尙傳天祿書千卷猶對青藜杖一枝無事

閒來依佛日白雲深處啟禪扉

次韻答王祖年

南山得話歲寒期道合寧論會面遲元亮休官能入社少
陵問法悟觀詩茶烹石鼎新敲火衣挂雲松舊偃枝自是
一閒天所放日高尙閉竹間扉

送徑山隆上主回吳中

海內車書喜混同飛雲流水逐行蹤秋風徧乞王城飯夜
月長聽官寺鐘物外閒情憐淡泊燈前軟語話從容明朝
棹指吳天杳矯首東南送斷鴻

至妙

至妙字湛然浮梁人族姓黃永樂間應詔舉高僧

賦詩稱旨賜衣帽宴儀部官簪花戲曰好花簪
向僧伽帽料得師心也愛花答曰若使此花能結
子老僧原是佛陀耶在座抵掌隨續曰未許此花
開佛地恐將春色穢袈裟衆益奇之

應詔賦塑騎雪虎羅漢尊者

凜凜威風色則空天寒流注梵王宮日高便擬閒尊者騎
上天台不見蹤

友益

友益姓龔字謙山新城人永樂間住廣照寺爲僧
綱司都綱有詩名

登廣照寺東樓

美哉東樓望一覽黎水秀簫峯凌紫霞爽氣生白晝野望
連南溪返照宜入岫人家樹高下城郭山左右梵宮坐相
望鐘聲雜更漏浮屠寶華宇碧殿香雲覆瀟灑樂性情俯
仰觀宇宙大塊如紅爐萬吹紛莫究有時讀古書月照牕
影透有時彈古琴風入松颺颺詩埒梅花清身嗜蔬飯瘦
幽興不可忘良時豈應復佳賓或往來仙客亦相就浩歌
秋水篇徙倚對靈鷲

欽僧

明餘干昌國寺欽僧解吟詠與胡學士儼善儼因
江西侍御某貽欽僧書侍御過寺見籬邊植木槿
命賦詩欽僧應口云

詠木槿

一作紹隆
禪師詩

朱槿移栽古寺中
老僧非是愛花紅
朝開暮落渾無恨
要使知色是空

行普

行普永樂時安仁馬祖禪寺僧

寺中作

馬祖舊禪家
懸崖屋半遮
瀑泉終日雨
林木四時花
月地鋪稀菜
雲根種好茶
石頭真路滑
妙落普陀伽

真可

真可字達觀號紫栢族姓沈吳江人五歲不語有異僧來摩其頂曰此兒出家當爲人天師言訖不

見遂能言年十七仗劍遊塞上至虎邱聞僧誦佛
名遂祝髮徧遊諸刹最後憩匡廬歸宗寺復入都
爲人解難妖書獄起逮下詔獄被笞乃索浴說偈
堅坐而逝

牢山訪憨山清公不值

吾道沈冥久誰倡齊魯風閒來居海北名誤落山東水接
田橫島雲連慧炬峰相尋不相見踏徧法身中

登那羅延窟

菩薩僧常住歸依上翠微山高疑日近海濶覺天低島嶼
屏中國波濤限外夷重來防失路拂石一留題

楞嚴廢寺

萬花叢裏畫樓新
玉女凭欄天上春
明月一輪簾外冷
夜深曾照坐禪人
嘉興楞嚴寺爲長水疏經處後爲吳尚書園亭師矢心恢復爲詩吊之後二十餘年復故

紺圖卽事

卜居在野曠寂無塵俗
想疎鐘深夜聞六根
瀉清響晝讀天竺書
幽意思忽見犬吠桃花陰
麥浪人來往最愛晚雨晴
空林返照爽

潭柘懷繆仲淳

谷水龍泉一片雲
去來誰復見離羣
夜深唯有滄溟月無限
清光不可分

結夏金壇之北園兼懷侯鐵菴

納涼何必獨夫容
水木清幽趣亦同
世上其高肥馬價
林間單放病僧慵
苔痕鶴過偶成字
月影魚吞不解空
更憶澹虛亭上夢
寒雲片片嶺頭逢

吳氏廢園

汾陽門第晉風流
縹緲湖山感勝遊
今日松蘿誰是主
斷雲殘月鎖江樓

築成金屋貯嬋娟
草廐花迷知幾年
愁見向來歌舞地
古槐疎柳起寒烟

瑠璃燈

誰把冰輪擲下方
老禪拈取掛虛堂
升沈雖復憑他力
內外從來本自光
未照金容猶冷淡
纔然寶座愈輝煌
莫將

龍燭堪相此不照人王照法王

月下偶成

靜夜無雲月正中清光何處不相同江南江北開臺殿幾
個心聞曉寺鐘

過天目山活埋庵

自古名高累不輕飲牛終是上流清吾師未死先埋卻又
向巢由頂上行

禮高峰祖師塔

二十餘年抱死關那來魂夢落青山臨行白骨無藏處擲
向金毛舌上安

曇旭鑄法華鐘成賦贈

沿門乞得萬斤銅次第靈文鑄七鐘一撞一聲經一卷天
寒莫怯五更風

如清

如清字石浪城固人祝髮紫柏山後居匡廬金輪
峯下有枯木吟

荅客問小徒到家消息

瓢笠星霜三月周計程應到錦江頭縱教雨雪羈行李不
在嘉州在簡州

若昧

若昧廬山開先寺僧有方響集

堯山余氏溪上納涼

夏館苦煩熱策杖出東扉於焉臨曲澗趺坐憺忘歸嘉木
散清陰芳華揚素輝先秋蟋蟀吟薄暮鵲鵲飛情忘境自
適心寂理無違願言與同好邱壑長相依

慧經

慧經字無明崇仁人裴姓九歲入鄉校卽問浩然
之氣是箇什麼師異之二十一偶閱金剛經如獲
故物遂出家依廩山忠禪師後住靜峯閣問興善
如何是道善曰大好山一日握石石裂忽大悟作
偈云云後住寶方復訪五臺雲栖諸老歸遷壽昌
先是西竺有識云壽昌好牧牛西竺再來遊至是

而驗

偈

欲參無上菩提道急急疏通大好山知道始知山不好翻身跳出祖師關

道奉

道奉字雪碣建陽人幼不茹葷叅廣豐博山每入方丈呈偈山曰透關的人句中便有活眼若只如此有甚用處曰如何是句中活眼山曰明日來向汝道嗣是每入方丈求益山曰且爲我入閩化緣去師從閩回舟中扯纜忽斷乃呈偈荅山云云後嗣博山席一以實行振刷宗門一日法堂匾墜呼門人宏瀚宏裕示偈而化

呈博山師偈

只這纜斷可惜吃驚船頭倒轉打失眼睛他時更有通霄路不涉途程意自明

廣心

廣心號養庵上饒人姓鄭氏家居聞客談含生皆有佛性義言下洞然遂出世禮翠峯祝髮至焦山夜半聞江中櫓船聲豁然開悟乃謁華山真定定以雲門六不收公案驗之當下脫然定可之而示以偈歸信州住靈山中臺旋上峯頂見大義舊址斬草重興用無縫鎖一把挂法堂露柱上榜云云及示寂塋於本山唐帽峰

榜語

上古流傳鎖憑君智慧開若無開鎖法相見不須來

天隱

天隱住廬山王偉守南康請住兜率寺卽他徒

抱疾

雨餘白石氣如炊濃綠陰中霽景遲經月未行庵下路樹禽引子去多時

智闇

智闇號雪關上饒傳崇儉子叅博山究船子藏身公案入槽廠見磨鼻拽脫有省呈偈於博山博山不肯點頭乃閉關謝客懸鏡反叅作雪關歌博山

始可之後居玉山瀛山寺又住鼓山再興湖墅乃
曰可以謝喻彌陀矣微笑而逝有炊香堂集

示宗頭陀偈

覩破雲門一字關千重百匝妙循環如今識得東風面優
鉢曇花遍世間

石澗

雪瀑交飛谷口喧石橋虎過漸黃昏瘦筇問我誰爲伴笑
指攀厓下樹猿

白雲

白雲居安福武功山誦法華經杖策峰頂見大蟒
蟠石上爲說偈蟒點首而去靈異甚多徧遊秦晉

吳越復歸武功見白鶯入池卽其處剏剏徒侶盈
千胸前有肉眼黑白分明一日珠自墮侍者持獻
曰非我珠也旋拈瓦礫示曰此是我珠忽集衆說
偈端坐而逝著有牧牛圖說

偈

明月落池心白雲橫溪上欲識往來機鐵牛吞火象

了經

了經廣信僧

歲旦上堂語

和氣生枯枿寒雲散遠郊木人占吉兆夜半露龜爻

元謚

元謚字見如南城胡氏子年二十出家投寶方寺
後入金樓峯聞蛙聲忽有省悟遂得道雲遊二十
年始歸

聞蛙偈

虛空偈仄一聲蛙大地含靈共一家十字街頭親眼看自
歌自唱落蓮花

羅仙庵僧

羅仙庵在萬年螺旋峯上去村落頗遠有高僧住
庵中每旦聞山下雞鳴異而跡之至峰下有石黑
色屹立酷類雄雞詢之士人果名雄雞石蓋石鳴
也乃爲詩云云

詩

辭籠惟恐近湯鍋來向山隈伴薜蘿止一點頭天下曉何
須絳幘倚銅駝

明雪

明雪桐城楊氏子薙髮九華往雲棲叅雲門澄禪
師聞鐘聲大徹後隱贛州之崆峒建安王請住百
丈入院整清規時復荷鋪與作務人俱謂大智再
來也崇正間一日黎明起浴手書偈擲筆而逝

偈

來亦無一物去亦無一物若知端的意百丈花梢月

本

頌以下 國朝

本領號別峯湖廣人順治中住伏江東平寺好吟
咏嘗有盜聚夥欲窘之師指寺前一石重千觔曰
爾能舉此否衆愕然師乃以左脇挾石踰山嶺而
下輕若鴻毛衆帖服著有偈詩語錄

再過頂山寺

穿雲尋古蹟撥草憶名香煙外猿聲老庭前柳色黃像靈
存劫火鐘冷帶秋霜舉目山林異臨風感慨長

望瀑布

搖曳殘陽上光分兩派懸青崖疑欲斷白練逐時還瀉壁
明同雪飛林影勝烟坐來鐘寂候乘月響層巔

雪 萍

雪萍明益藩裔名和壘寄跡方外住建昌府城東
中洲寺號竹溪子間與諸名人往還嘗返俗復爲
僧終於芳洲寺著有中洲序芳洲詩草永思錄萍
草雙玉硯記

辛丑夏閩汀遷母墳不果

切憶親墳數載懸淚痕灑處夢魂牽孤筇冷撥千峰霧短
髮風梳四月天萬縷愁腔空自返一行心事許誰傳分攜
閩嶺難爲別杖笠迢迢又幾年

中洲感懷

擬共寒山學懶癡水雲無恙路多岐蹤迷野草前村杳足
寒荒洲去意遲豈望碧雲慰思婦休將黃蘗止啼兒朱顏

瞬息霜催鬢便合辭家去采芝

落葉飄蓬宇宙間煙霞復覩舊時顏寧教破屢從東郭勿
使移文到北山出谷鳴鶯忘故侶焚巢旅燕得生還惟懷
祖德傷心極名節難完淚暗潛

步入天台一逕斜仙源深處覓生涯苔茵蹙繡鋪危石霜
葉流丹映斷霞休羨閨中歌柳絮聊從洞口看桃花凡情
未斷嗟劉阮采藥歸來失故家

莫漫牢騷寄越吟且同影子說知音嚼殘梅實忘酸味擘
碎蓮房見苦心萬種閑愁消逝水一聲長嘯倚高岑餘生
祇合筠溪隱坐待龍孫長竹林

乙卯次妹遇難自經

三十餘年少弟昆
寥寥公族兩人存
傷哉弱妹重遭劫
腸斷西江夢裏魂

貪生余且逃
禪寂能死君堪紹
母儀地下團
藥應見憶吞
聲滴血寫哀詩

大成

大成號竺庵
新城人七歲能詩
初薙髮南岳閉關
十年禪理大悟
後住棲霞以文字
名禪金陵士大夫
多重之著有攝山
南岳諸稿

挂笠歌

破破屋新修
葺矮矮壁堪挂
笠挂笠高眠
臥看山松柏青
葱雲鳥集煮菜
甲烹石汁紅火
爐中白露泣泥
壺細酌雀

舌茶瓦鉢滿盛鸚鵡粒寬著肚皮不用急寂寞林泉足採
汲浮生如夢有誰醒此境世人扳不及秋風酸秋雨澁落
葉打窻窻紙濕夜深趺坐聽月明月明竹影亂飛入空階
夜半何人立溪谷沉沉香霧襲閱罷殘經復讀騷撫掌狂
歌笑寒拾

雪樵歌

雪紛紛滿山落喜聽樵夫呼諾諾腰橫雙刃赤雙足哩囉
哩囉歌自若披棕衣繫藤索擘開雪浪入雪壑瑤草靈芝
渾不看琪林玉樹仰天斫風颯颯煙漠漠銀籠似舞衝霄
鶴一聲瓦喇下雲顛千峰萬峰盡驚愕空隱隱光灼灼風
流脫體貌綽約瓊漿挹取付雲厨香飯炊來對雪嚼人道

仙人用心錯徒向深山閒採藥饑食渴飲事平常大道何曾有繫縛

智季

智季號次齊樂平程氏子祝髮後叅靈山養庵遂承印記順治初開創鈐山嵩山庵竟成叢席康熙癸亥一日說偈云云坐化

偈

年登九十六生緣隨分足踏翻水底天好唱無生曲

曇瑞

曇瑞號竺堂本安福劉氏子落髮後入廬山觀影語有悟於是徧參諸方最後從五臺歸適兵後寺

宇頽毀漕帥某重建崇恩寺居之康熙壬寅年九
十一書封龕辭世等偈跏趺而逝

回寺詩

誰知殘劫後又入此中來飛鳥巢無樹行人坐有臺浮雲
隨幻滅嵐瘴自風摧留得青山在空餘夜壑哀

本 慈

本慈號惠周鈇山程氏子年十八隨父出家叅嵩
山次齊師授記荆康熙丁巳居方丈凡八載每冬
結制操練嗣法者甚衆後預書法語云云書畢跏
趺而逝

封龕法語

五十九年大座當軒今朝且退一步看取紅日中天

舉火法語

火焰中藏身煙雲裏出手人天何處覓踪由翠柏蒼松獅子吼

入塔法語

己自活埋了何勞起骨堆稜稜無縫隙端不涉三災

道昱

道昱康熙中新昌資福寺僧著有莖草堂詩

曹溪溯古

蒲室傳心溯碧流曹溪自古抱林邱閑情似水無羈滯談興如鷗任去留洗耳高踪誰可繼濯纓幽意杳難求已知

一滴爲霖雨未到人間不月休

道彰

道彰新昌僧著有洞山錄草堂詩梅花詩

夜合山

山城無鎖日初低石洞雲深石徑迷曙色未分人未起是誰敢作曉雞啼

心空

心空號翠霞南豐僧

溪山雜興

皎月橫今宵照此溪山古山雲倦思還勞人長夜苦白楊風蕭蕭冠冕終黃土行行重復悲岐路空延佇秋露沾我

江詩集 卷九
裳疑聞松上雨遙天滿清輝那得雲梯取

登南山

南山何寂寂獨有倦雲還日落孤煙上林空一鳥閒荷香
浮水面竹屋隱松關倚杖柴門立臨風羨白鵝

續元

續元字淡遠廣昌僧

香山夜坐奉柬南豐謝先生

閒步花陰晚林深萬籟生孤松吟澗谷片月老柴荆香草
含幽思春風起別情他時回首處百里暮山平

登六字峰玩月

月出六峰上蕭蕭萬樹秋四山延野趣一徑足雲遊樹葉

聞風舞鐘聲帶露流吾生渾淡泊長嘯更何求

半俗子

半俗子亦曰宗頭陀號祖曇旌姓華瑞昌人因見
同歡逝者十餘人惘然有省禮廣豐博山異和尚
退依雪關閭爲師偶見桃柳發暢作偈博山詬罵
之示以壽昌吃緊用工處遂掩關閭以偈示之乃
荅云云由是道聲洽於叢林後代闍席

荅雪關禪師偈

關前十字真臧驗側掌韶陽鈎鎖環要識而今真面目拈
花座上一開顏

豁通

豁通字谷音蓮花廳福田庵僧

秋日重過獅林山訪天然

離羣歸故地念友復登山
木落霜前葉花開雨後顏
由來丹桂好未及白雲閑
輪與林中客重來見一斑

力宗

力宗字相隱蓮花廳福田庵僧

雨花橋

閑從林外訪招提
萬丈垂虹飲碧溪
滿眼迷離花雨墮
水聲如和鷓鴣啼

先道

先道字慧加蓮花廳西源庵僧

石鵝山

片月流光到薜蘿三峰縹緲夜雲多石苔鵝跡分明在換却修翎記得麼

休休

休休豐城范氏子壯年妻子俱亡因薙髮於白衣庵遇異人挈之遊羅浮衡嶽諸名勝有所得而歸以酒肉自晦咸目爲顛善畫達摩面壁渡江二像揮灑數筆神致如生沒後數年有自江北見之者醉臥斗門橋口占

醉臥沙隄看野鳬人人笑我是狂夫幾番欲往西天去又怕西天沒酒沽

元潔

元潔號睦堂少出家謁瑞白老人於弁山久之大
悟隨訪祖師遺蹟於分寧之洞山守牧請住雲巖
掃十祖無住祖師塔恭請上堂作偈云云有語錄
偈

十二年來未出山了無消息到人間相逢盡道拈花旨未
委何人解破顏

冰鑑

冰鑑得法於密雲悟至分寧禪林寺坐巖中三載
被苦臥薪嘗絕火食與虎出入後住黃龍

告虎偈

與爾爲隣已一年同林出入兩安然如何夜半高聲吼驚動岩中老衲禪

慧林郭和尚

郭和尚舒州人廣信靈山養庵四世法嗣也嗣住峯頂三十餘年

謁邑宰潘公

十年未出山一日來城郭杖履帶烟雲琴臺看白鶴

心田

心田字鼎玉號晦石俗姓汪歙人出家禮雲居樂師復隨慈引入玉山普寧寺寺自唐闍立本捨宅以來興廢無常心田與慈引復新之乾隆辛未瀛

山虛講席衆延心田主之工擘窠書與詩人過從
唱酬爲樂有坐對黃花晚行看落木疎一輪萬古
月萬古令人心等句爲同人所賞

次倪學博帝簡歸肝江韻

閑官去住似閑僧雲鶴翛然作友朋最是愁人楊柳渡年
年送別月初升

宋女僧

無著

無著宋丞相蘇頌女年三十出家參大慧得悟號

妙總禪師

絕句

一葉扁舟泛渺茫
呈橈舞棹別宮商
山雲海月都拋却
贏得莊周蝶夢長

江西詩徵卷九十

江西詩徵卷九十一

南城曾煥賓谷編輯

道流

徐

慧

以下唐

慧字子奇豐城人家廬陵幼師中黃次參藍真入
究元旨賜號淨明配道格神昭效法師五月望日
作偈擲筆端坐而逝鼻流玉筋尺餘

偈

這箇臭皮袋撇了無罣礙烈焰火爐中明月清風外

自贊

生前我卽汝死後汝卽我於是二中間誰會識真我

許堅

堅字介石自號布裘道者廬江人早歲以時事干
江南李氏人以其狂不之禮因上詩徐鉉拂衣歸
隱茅山宋初自茅山遊廬山居簡寂觀或在洪州
西山吉州玉笥山

宿溧陽靈泉精舍僧以白字韻請留詩

近枕吳溪與越峯前朝恩賜靈泉額竹林晴見雁埕高石
室曾棲幾禪伯荒碑字沒秋苔深古池香泛荷花白客有
經年別故林落日啼猿情脈脈

幽棲觀

仙翁上昇去丹井寄晴壑山色接天台湖光照寥廓玉洞

絕無人老檣猶棲鶴我欲望青蛇他時冲碧落

題茅山觀

嘗恨清風千載鬱洞天今得恣遊遨松栢一色古壇靜
鶴不來青漢高茅氏井寒丹已化元宗碑斷夢仍勞分明
有箇長生路休向紅塵歎二毛

題扇

哦詩但寫胸中妙飲酒能忘身後名但願長閑有詩酒一
溪風月共清明

上徐舍人鉉

幾宵煙月鎖樓臺欲寄侯門薦禰才滿面塵埃人不識漫
隨流水出山來

陳景元 以下宋

景元字太虛自稱碧虛子南城人神宗朝爲右街
副道錄賜號真人乞歸廬山每著書什襲藏之有
佳客至必發函點定役二奴一曰黃精一曰枸杞
王安石王珪蔡卞皆與之遊

臨化作

昔之委和今之蛻質非化非生復吾真宅

張景端

景端字子仁嗣漢二十九代天師大親初贈葆真
先生

題梅山

作尉南昌日投書北闕頻忠言不悟主直節恥爲臣漢室
多災異吳門念隱淪掛冠忘寵辱蒙袂出埃塵虹蜺英雄
氣鷗羣自在身永懷三洞訣高謝九江春擇地開仙館看
雲翦壽巾元臺秋步月虛室夜凝真無夢生芳草留年養
大椿碧茸香不斷青鳥性偏馴太液刀圭就中黃道路新
武夷空墜馬郁木竟棲神絳節雖朝帝靈波尙濟民一名
傳舊史千古事嚴禪瑞氣生仙藥清風付羽人壇遺金鼎
像井鎖玉華津地接洪厓府溪通劔水濱鶴歸雲抖擻龍
起石鱗皴已悟身爲患元期德有鄰青山不忘我今日是
天親

張繼先

繼先字嘉聞貴溪人嗣漢三十代天師崇寧中賜
號虛靖先生

游洞霄

洞霄深處日棲真
仙子親曾此致身
鳳闕有人來獻禮
溪聲山色愈增新

仙巖寺

依然仙蹟倚岩間
真館何年竟草萊
今日梵宮方得到
舊時去鶴也飛來
一條澗水琉璃合
萬疊雲山紫翠堆
神宮夜深能獨坐
滿窓明月正徘徊

陳孟陽

孟陽閩阜山道士

答清江錢大尹問閭阜山中景

形如閭阜對清江吳漢神仙古道場玉像靈多民受賜太
書歲久墨猶香絳霞密鎖靈仙館碧霧輕籠正一堂蒼蘚
爛斑雙鯉石寒泉澄湛九龍塘著衣臺上三冬暖鳴水亭
前六月涼摘藥鳥聲喧夜榻昇天馬跡印西岡葛鵝源深
生異草菱雲峯峻染瑤光丹井雖存人杳漠松巢空見鶴
飛翔屏妝水墨誇閭閻門斷塵埃憶孟昌風來松檜笙簫
地春入園林錦繡鄉箇中自少紅塵到閒裏惟知白晝長
景物敢吟成寶錄願憑賢宰一稱揚

楊權

權字正夫盱江人自少穎悟不羣聞張真牧有道

行往從之授以九返之術後舟次九江泥汭嘴遂
結茅修煉其中時大疫施以符水輒效嘉熙四年
語其徒曰吾今歸矣乃留偈云云危坐而逝咸淳
中封通慧孚惠真人

偈

七十九年夢覺五湖四海隨緣撥轉雲頭歸去曉日東生
亦然

楊至質

至質字休文號勿齋閬阜山道士淳祐中敕賜高
士右街鑒儀主管教門公事著有竹宮表制太乙
宮代言之文

茅山

玉肺浮空已字山五門不鎖洞天寬紫花可創秋尋木紅
燄難埋夜見丹畫出一牛方水草飛來三鵠各峯巒仙蹤
寂寞高風遠誰爲先生指額癢

連可久

可久安仁人父鼇好結納道友可久幼時有熊曲
肱者令作漁舟調調成目爲神仙中人後居至道
宮嗜酒能詩將化咬指在盤面書云云書畢血蹟
染穿盤下

書盤面語

立化也不好坐化也不好惟曲肱而枕之便是蓬萊三島

張宗演

以下元

宗演貴溪人三十六代天師

至元壬午暮春旣望游洞霄伏觀虛靖留題次韻

洞號棲真境絕真若人到此豈凡身一從虛靖題詩後仙

墨光芒日又新

張與棣

與棣貴溪人三十七代天師

遊洞霄

洞天福地豈仙鄉一派丹泉落礪長山鎖九重塵不到樓
高百尺鶴來翔遠游煉藥遺踪在坡老題詩淡墨香莫怪
入山雷雨作蛟龍蟄久始騰壙

張與材

與材字國梁號薇山別號廣微子貴溪人居龍虎山嗣爲三十八代天師大德二年投鐵符治海鹽水怪五年禱雪盈尺成宗喜加授正一教主給銀印視二品至大初特授金紫光祿大夫封留國公給金印視一品皇慶初特賜寶冠金服

張公福地

秋風吹衣草樹涼巨靈守護神丹光袖携天香入洞府散作雲霧空蒼茫拄杖鏗然響微步石髓垂垂潤甘露時當相遇五百年分明中有昇天路

冲元觀

參差樓閣半天中六月清風百尺松隱約齋壇低曉月五
雲深處一聲鐘

游洞霄

奇石玲瓏古洞天蒼雲九鎖翠蛟泉仙翁白髮顏如鐵自
說居山八十年

虛室無塵結篆香雷驅急雨送新涼山中詩卷如仙譜此
是吾家第四章

張嗣成

嗣成字次望號大元貴溪人與材長子父子俱

善畫龍道行顯著延和三年嗣爲三十九代天師

襲領江南道教領三山符籙如故

題葉氏四愛堂

彭澤以節高舂陵以道鳴雙井詩之雄西湖隱而清因其
有所愛希賢動吾情應知君子堂貴實不貴名

張嗣德

嗣德號太乙子貴溪人與材次子善畫墨竹禽鳥
至正甲申襲教事授正一教主嗣爲四十代天師
太一明教廣元體道大真人主領三山符籙掌江
南教事

題葉氏四愛堂

東籬秋色淨芳沼晚華滋雪落清澗曲風生楚江湄幽景
尙依然高懷逸難追道人繼芳躅千載有餘思老屋四五

緣草徑臨清池四時各代謝芬芳常在茲勗哉著令德永
與古人期

灤京八咏

鳳閣朝陽

開圖行都重朔城大安高閣煥鴻名中天旭霽昭黃道萬
歲春熙拱帝京瑞露氣浮仙掌動文星光挹泰階平朝元
羽佩輝蟬冕長振琳瑯侍玉清

龍岡晴雪

陰山積雪亘春秋霽景玲瓏燦十州玉展畫屏當黼展翠
凝香霧繞龍樓吟懷煖動鼠羣筆酒力寒輕狐白裘清暑
年年動游幸冰壺六月坐垂旒

勅勒西風

勅勒連營意氣豪
西風沙漠轉驚濤
早鵬背影翻金箔
赤驥騰空頓紫條
入夜清歌諧盛采
蚤時新酒壓葡萄
旃廬處處人長樂
萬里雲屯雪自高

烏桓夕照

烏桓列部挺提封
落照千山返映紅
遠樹參差連塞北
斷霞明滅際遼東
牛羊下夕羣屯霧
鷹隼橫秋勢掠風
亦有隱淪懷濟世
何時歸獵載飛熊

灤江曉月

灤江曉月漾玻璃
皓景沈沈碧海西
監牧平沙時洗馬
趨朝青瑣正聞鷄
鐘聲破霧騰珠剎
橋影垂虹枕玉溪
夙德

詞臣勞勩從恩承紫誥又春泥

松林夜雨

百萬蒼虬幾雪霜夜深和雨激滄浪秦金賜爵總東岱漢
玉搜才負柏梁劍戟森嚴堅歲暮珮環鏘奏際時良千年
琥珀應流地服餌身輕久帝鄉

天山秋獵

駕幸天山校獵場夜嚴精騎裹餼糧鷹鞬脫臂高橫塞雉
箭穿雲急解囊豈但薦毛供俎豆要知閱武固金湯歛圍
賜宴千軍醉駝背纍毛總兔羊

陵臺晚眺

李陵行處莽平原祇見荒臺思愴然野日斷鴻空送晚塞

雲歸鶴不知年千重牙帳開周後萬里長城啟漢前雅調
早傳來魏闕廣歌尙擬頌堯天

聶碧憲

碧憲江西人元初嘗爲龍翔宮書記後爲京口天
慶觀主

詔赦至感而有詩

乾坤殺氣正沉沉又聽燕臺降德音萬口盡傳新詔好累
朝誰念舊恩深分茅列土將軍志闕舍求田父老心麗正
立班猶昨日小臣無語淚霑襟

哀被虜婦

當年結髮在深閨豈料人生有別離到底不知因色誤馬

前猶自買胭脂

咏北婦

雙柳垂鬟別樣梳
醉來馬上倩人扶
江南有眼何曾見
爭捲珠簾看固姑

吳全節

全節字成季號閑閑安仁人年十三學道龍虎山
至元中從張留孫見世祖賜號上卿元貞初特進
元教大宗師崇文宏道元德真人雅好結士大夫
無不傾交長者尤見親敬又推轂善類振窮周急
有俠士風卒年八十三有看雲集

紫禧觀

門前流水泛桃花回首蓬山別一家曾把金莖餐沆瀣閒
揮玉麈看琵琶火存丹鼎春長好卷掩黃庭日欲斜心與
江湖天共遠大開瀛海駐吾槎

崇禧觀

曲林古觀水西流天遣皇華駟玉蚪高士遠分龍虎派哲
人久伴鳳皇游樓臺山色三峰曉池館泉聲五月秋雲篆
凝香浮洞府坐令和氣藹丹邱

洞霄紀遊

山盤九鎖之元路峯聳石高天一柱藥宮絳闕會天人紅
杏碧桃恩雨露神仙隱跡過雲根滄海桑田知幾度丹泉
飛雪暑月寒龍驤鯤擊晴雷怒森森雲樹交參天層巒疊

嶂無重數來賢高敞翠微亭峭壁烟嵐登杖屨七竅靈從
混沌開洞戶嵌空星斗布潭潭大滌神龍居馬瓢蘇旱分
甘澍棲真境勝非人間華蓋浮空列星聚蛻龍鳴鳳紀禎
祥石室白茅迷二所目送歸雲不可登袖舞天風欲凌步
天工借我一日晴萬狀呈奇明指顧朗吟長嘯振碧虛山
靈怪我來何暮千年遼鶴歸未歸人世蓬萊在何處

奉介石先生一笑

翠蛟亭上獵坡仙松籟溪風撼洞天手掬丹泉觀止水步
穿元圃卜歸田心清隱士飢餐柏物外高人空愛蓮九鎖
此游端不負剩添清興入吟邊

再用韻贈孟集虛

東野名如賈浪仙雲孫抱道隱沖天乾坤體用歸虛室水
火工夫治寸田得見琪花成錦樹方知瑤實結金蓮當今
剩有徵賢使第恐聲名到日邊

會飲介石蓬山堂

此日蓬山酒斯文得細論虛堂納天柱流水漱雲根冰雪
同三友詩書萃一門外方名籍籍內景性存存

送虞伯生使蜀

送別應思舊所經秦川花柳短長亭三峰高拊仙人掌萬
里先占使者星錦水東流江月白潼關西去蜀山青當年
不盡空臨意待爾重鐫劒閣銘

望戴軒

茂林修竹岸西東
白鳥行邊釣艇風
市井恰當荷蓋外
樓臺渾在柳絲中
煙濃湧出金仙塢
雲薄飛來玉帝宮
更問戴家何處是
放生池沼畫橋通

至大三年代祀茅山宿玉晨觀

皇馳六轡過華陽
晉檜蒼蒼古道場
夜鶴唳風清地肺曉
龍行雨護天香三
峯恍惚蓬萊境
萬象昭回草木光
青石壇高天只尺
綠章封事答吾皇

登大茅峯

第一福地第一峯
玉臺積翠摩蒼空
大君成道一弟從
還丹返老顏如童
繡衣趣召凌天風
此事萬古將無同
山高有仙水有龍
龍腹如篆林如紅
蜿蜒變化理莫窮
作霖濟

學年屢豐神仙爲市壇朝宗真人渙號芝泥封猿鶴相語
千載逢葵心耿耿通宸極萬里六轡馳花驄香飄龍篆江
雲東瑞凝草木氣鬱葱稽首峯頂歌元功他時歸奉明光
宮

三峯

午夜瑤壇謁帝還
筍輿衝雨兩山間
客來似覺茅君喜
淨掃浮雲出好山

牧齋真人華陽道院

龍輶三峯擁客查
采真訪古意無涯
雲山夜雨棠梨樹
宇宙春風棣萼花
龍洞遠分丹井水
鶴松高映赤城霞
宗師應帝光前緒
山館新開第一家

喜客泉

客遊華陽天山逕肩竹輿首登大茅頂天市神仙居同觀
喜客泉稽首孫仙姑方池鑑止水湛湛涵太虛仙君驅馳
龍爲吐萬斛珠滾滾出石底拍手相歡呼有情感無情此
理妙鼓桴泉喜客亦喜主人當何如我願斟一勺萬物同
霑濡歌詩謝山靈臨風重躊躇

金清境界

境界全清地位高山中盡日樂陶陶旋劍白石開三逕可
是青山厭二豪眼底浮榮看草露耳根清韻起松濤明朝
匹馬西湖路回首靈峰聳巨鼇

別茅山

長松古道翠深深回首層巒聳積金鶴語雲峰人換世風
吹仙路客來今連朝晴雨隨人意到處烟霞感帝心如此
山川歌不足行看袞袞出詞林

延祐元年五月重祀茅山瑞鶴詩

并序

至大庚戌秋百餘鶴集大峰一宿宗師劉君以其
明年入覲嘗圖以獻茲以上命再祀宗壇比至下
泊有鶴十二若相迎導遂賦二絕并紀之

一雨三峰分外青巖花澗草共欣榮茅君問道天香至先
遣西山羽駕迎

圖寫丹青上九天秋風百鶴駐山前誰知六轡重來日又
見排空十二仙

重登第一峰

重登大峰頂曉色正蒼涼華構烟霞壯幽居日月長碧雲
浮洞戶清露沁衣裳水淺元龍躍林深黑虎藏去天疑咫尺勝地豈尋常屏俯金峰畫爐分玉案香會仙猶有市濟世得無方藥圃多春意丹房耿夜光何時結茅屋稽首禮華陽

二峰

壇高青石古峰小白雲多樂奏仙君喜茶香使客過神丹
藏蕊笈清露滴松蘿略接金鼇背回輶發浩歌

三峰

二峰琳宇狀松老鶴知還江白南徐月樓青北固山浮雲

通地肺古洞徹天關寄語尋仙者蓬萊只此間

震靈方丈贈玉虛宗師

曉起南窻看白雲道心如水鬢絲銀當時宣室前釐席此
日仙壇得主人方外烟霞知有喜掌中雷雨信如神夜來
親見茅君說五百年間再世身

送原功太監南歸

漸覺文星闕下稀奎章兩見送行詩渭城朝雨歌三疊湘
水秋風賦九疑國典綢金藏鳳闕詞臣步玉卽龍墀席前
時有蒼生問可向江南久別離

題饒氏雨樓

夜夢蒼蚪遶屋梁曉看飛雨灑浪浪潤涵琴調清風遠涼

入書聲白晝長翠壁凝雲流石乳綠疇翻浪沃金穰何時
剪燭西窗下却聽檐花共醉鄉

題葉氏四愛堂

方今文采重奎章光照芝山四愛堂梅蕊春融冰雪界蓮
花晚靜水雲鄉湘纍往矣蘭爲佩陶令悠然菊泛觴千古
高風猶一日迢迢歸夢楚江長

沖佑萬年宮

武夷天賜萬年宮雲隔蓬萊夢已通玉旨煌煌鑄石壁權
歌隱隱渡溪風帆歸海國春潮祿市俯星邨晚照紅不用
廣寒修月斧奎章大筆紀成功

予昂諸賢賦天冠山五言詩二十八首模寫已盡矣

余遂作唐律一章題卷尾云

青山特地聳天冠
聞說羣仙駕紫鸞
浮世黃金空白髮
倚雲蒼玉尙元壇
松根怪石千年化
檜頂飛泉六月寒
宏景定辭神武去
鷗波浩蕩錦江干

江上作

短櫂輕舟幾度過
月明江上竹枝歌
故山歸去青依舊
華髮添來白已多

方方壺惠山舟行圖

甘河當日逢仙客
七朶蓮花變金色
洪崖得道隱山東
夜神光丹室白

謹題王鵬梅金明池圖

龍舟疊鼓出江城送得君玉遠玉京惆悵金明池上水至
今鳴咽未能平

題米元暉畫雲山圖

谿上青山過雨濃分明倒滿玉芙蓉令人却憶匡廬頂百
丈銀河下碧峯

雨外夕陽搖樹明山雲吞吐亂陰晴飛帆一點知誰子疑
在元暉畫裏行

中嶽廟投龍簡

陽城大地中坤靈奠神嶽積翠千層霄元氣遠盤礴降祖
生申甫形勢控伊洛崧嶽虎豹蹲偃蹇蛟龍躍猛士橫戈
矛奇陣出幃幙簇簇羅旌旗巍巍聳臺閣玉鏡爲誰開金

櫛爲誰鑰遠近列畫圖周遭峙郭郭萬狀不可名起伏互
連絡皇皇聖帝居歷代重封爵老柏浮蒼煙古殿蝕丹艸
天朝混華夏秩禮特優渥皇慶二載春宵旰軫民瘼有旨
醺長春玉簡命新琢詔臣走登封香幣致虔恪遼洞藏寶
符瓊音降笙鶴三呼今復聞祥風度天樂小臣奉明祀三
使陟雲嶠箕山勝可家潁水清可濯遐想飲牛人高風動
寥廓賜珎知何時分我雲半壑歌詩勒嵩珉用贊聖人作

壽慶堂

王氏建

堂成仙子捧流霞文物衣冠見世家江上青山如玉壘山
中白石亦金華雲連壽櫟千年樹日映蟠桃幾度花天府
歸榮傳錦里行看丹鳳降黃麻

朱本初

本初臨川人出家上清宮三華院嘗從吳全節居
都下博洽文雅見稱於卿相間人稱貞一先生有
貞一稿范德機虞伯生等序之

盜發亞父冢

戲馬臺前范增冢英風千載行人竦冢中寶氣騰光芒識
寶賈胡心爲動築室潛謀二十年一朝鑿井穿其壘畚鍤
纔深四十尺乃有石盤青龍從四旁牂牁大十圍各施九
十森環拱石穿棺嬰更分明潒光可鑑剛而韞斷之不用
揮金椎白骨儼然全頂踵寶劍未化橫蒼虬金玉輝耀氣
交擁賈胡致富須臾間弃骨溝中寧愧恐平原無色鼓角

悲山鬼夜號川澤湧太守陳公英俊才慨歎奸偷吾所統
亟呼五百取羣盜械置狴狴見仁勇傷哉亞父天下奇鴻
門高會真危機火龍飛起實天意拔劍起舞空爾爲風雲
變化失隆準玉斗一碎山河非如公明義古亦少發憤乃
作彭城歸六合茫茫漢疆土厚葬何人誠可嗤君不見驪
山牧豎遺燼酷不如王孫裸葬良亦足

黃石翁

石翁字可玉號松瀑南康人世儒家居廬山下少
多疾父母強使爲道自號獨叟卒年六十餘有松

瀑稿

題米元暉湖山煙雨圖并序

湖山煙雨圖初裝卽作此詩久而未寫病後眇眇

聊試目力

江南舊物澄心紙百數十年誰得此揮毫無復老元章付
與承家大兒子展開素幅仙湖山點染興入蒼煙間偶然
墨雲起霏霏風雨偃林生暮寒筆端奮迅有疾急雨氣淋
漓紙猶濕世人藏畫尙精微到此精微下風立流寓東南
誰與鄰傾懷付與李家親忽因微駁論資格紙上數峰微
笑人

墨梅

去年曾訪林君復煙水蒼茫鶴未歸不似對君橫小幅一
枝和雪照柴扉

自麻仙至筆架道中作

三步五步歇六日七日晴豈不念我歸春色相送迎前宵
社酒散行將返清明紅紫小零落嚶嚶相和鳴叢薄山礬
花玩之有餘馨亦欲寄所思歸鴻已宵征悠悠不可極惻
惻難爲情荒荒誰與語脈脈曳杖行

望雲

日出五丈高白雲浩如海城郭在雲中山人在雲外望雲
雲氣深入雲雲氣淺亦欲入深雲不知雲近遠

飯山道院

萬鍾鼎食不到我正自不必西山餓飯山雲氣如炊煙三
餐而反腸果然臨川丞相有素願何處獨無魚羹飯勸君

飯客先飯窮往往乞句皆英雄

送高麗五明馬

海波不動關梁通虬犇使者來吳中
名騅額間挂明月四蹄猶帶龍堆雪
仰秣不受田家芻大官之羊五味俱
賢才萬里不難致糠粃不充吁老矣

客語

舊時供奉曲歌者亦無人但感歲年
晚不知天地春客猶談寶慶吾亦及
咸淳何處楊花過飛來照角巾

午日

世故一炊黍吾生百鍊銅客情傷髮
白醒眼對榴紅遠岫冥冥雨疎衣細
細風欲論千古恨不見楚南公

次韻謝新荔

海國仙人翦絳霞年年一朵到仙家眼中玉色如何晏席
上風流得孟嘉野客不分唐殿帶老臣并按建溪茶醉來
往事都休問且擘輕紅對晚花

寒食客中

明朝便典黑貂裘寒食寧無數日留煙斷舊嘗悲介子火
衰今不祀商邱百年盡付風吹柳一雨遠隨山入樓安有
五侯鯖到我自修茶事試香篝

慘澹微茫斷客魂最難忘處最難言南陵不可避風雨麥
飯何如託子孫往事滄江推白鳥誰家鐵撥送清尊欲尋
隱者相傾側煙柳深深不見門

暮春計籌山中寄句曲山人

松花落粉啼子規山人燕坐春晝遲石泉豈非大韶樂日
色猶是鴻荒時筠簞竹杖烟中語青紙丹書林下詩應謝
錢塘舊知識白雲獨往無還期

碧桃

洗盡嬌紅出翠帷玉人無語背斜暉綠花前度通仙譜天
水何年染素衣宴罷瑤池春夢斷影寒姑射夜深歸禁煙
時節多風雨莫遺錦英一片飛

查居廣

居廣字廣居臨川人少入金谿望仙觀爲道士復
之龍虎山從廬山黃尊師石翁學爲詩與范梈機

楊仲宏揭曼碩孫履常俱友善天歷中卒有學詩

初稿

孝子行

并序

豐城廖孝子至元十九年鄉寇大作子負母冒刃
逃反靖養終身與江革不殊惜無史書之揭翰林
近題其墓曰有元純孝廖某之墓又爲作文刻石
虞學士書之

豐城昔在至元歲寇賊紛紛亂如鬼是時廖生抱母行不
死白刃天有情固知至願天必感母子全活見太平廖生
雖死猶未死往往遺民言此事有如江革遭亂離負母逃
潛經險阻情詞惻惻賊舍之孝德還堪耀今古嗚呼薄俗

獾獾同墓上請看純孝風

二銀女祠

銀冶二女祠撫州之金谿其家姓葛氏無字年未笄羞顏
不出戶婉孌守禮儀在唐寶歷歲其父爲胥吏官家起銀
場日夜遭鞭箠勤紅問父苦玉頰啼朱雨父命斯易活誓
以死相許禽獸尙知義報父寧死心投身入銀冶遂化成
白金郡縣驚且歎奏名上朝端下詔罷爐冶鷄犬皆平安
已經五百歲歷歷人猶傳荒祠俯流水像設還儼然世間
盡兒女此事誰能前緹紫費娥去未有堪比倫可比惟英
皇雙魂抱煩冤至今湘江竹出土含淚痕

胡波斯引爲丹陽氏仁

紫鳳檀瓢剖鳴玉燐燐鏡面蚺蛇腹銀絲四索挂寒冰中
有驪珠三萬斛丹陽老人今樂師當筵一曲胡波斯太罕
新聲變哈失曹綱縮手昭君悲振軸抽絃彈曳樂厓亂金
盤撒飛雹貝官月冷泣雌蛟瑤漢秋清叫孤鶩玉壺水咽
銅龍哀繞指忽作盤空雪劍光迸火玉斗碎馬蹄飛蹴河
冰裂洪牙促羽調聲轉壯士氣酣毛髮立蹋歌起舞勸一
觴不惜花袍酒淋濕老人波斯技絕倫出入侯門三十春
銀鸞半臂紫貂帽光動生翁筵上人繁華轉眼成今古獨
技波斯向誰鼓歸來醉臥錦羅毼高樓一夜梨花雨

送危方逸之京

石門江上送危郎好士神京北斗旁漢代文章須賈馬周

家道德並虞唐柳林馬過沉雲黑沙磧駝鳴落日黃爲計
遊程二千里朔風吹雪正茫茫

薛元曦

元曦字元卿河東人徙貴溪年十二辭家入道龍
虎山事張留孫吳全節延祐間用薦召見侍祠至
正三年制授宏文裕德崇仁真人自號上清外史
著有上清集

次韻歐陽檢閱濠池觀荷

行行濠池上亭亭見長荷瓊葩耀初日碧芰卷輕波深蒲
曉色亂微雨晚香多方舟時自移高軒或來過豈無河朔
飲那復發商歌商歌一慷慨此物奈君何

野宿山簡虞博士王待制

迢迢野宿山峰巒何崔嵬朝登猛虎嘯暮宿元猿哀高巖
四面發花鳥爲誰開傳聞章皇帝此地昔徘徊龍駕竟不
還浮雲空往來秀色九天外巨靈不敢摧飄搖散襟帶覽
結何悠哉

題高尙書夜山圖

高李風流仕西浙共倚危樓望吳越吳越江山千萬里高
侯畫對中秋月生紙經營入董源朦朧煙樹迷宮闕玉露
沈池四次寥潮聲已息簫聲咽不寫思陵全盛時空遺白
塢堪愁絕君不見王子猷亦向山陰弄雪舟誰拈秃筆掃
清遊古今嘉致總悠悠

燕栗總管玩芳亭子

栗氏林亭好飄飄借馬遊藥闌當戶密花逕近城幽未許
朝參嬾聊爲逸興留使君行樂處風物爲春柔

送文郎中奉使交趾

天子龍飛統萬邦玉符封檢下殊方遠人盡是雕題獠奉
使唯應粉署郎翡翠飛時銅柱溼鵲鵲啼處石門荒炎風
苦雨煩珍重葵葉檳榔取次嘗

送陳都事使雲南兼寄李仲淵廉訪

送君銓選使滇池部落諸賢自品題明月先經楚子北長
風却度夜郎西山橫塞雨驂騑滑花發蠻雲杜宇啼爲問
霜臺李廉訪白頭官滿尚羈棲

宋顯父秘書惠海子北門之什次韻荅之

得君佳句見君情春半閒從海上行紅杏啼鶯沙苑遠綠楊嘶馬漢堤平玉山地勢連雙闕金水河流注夾城萬壑以仁懷遠邇遊觀宜著魯諸生

送朱本初之玉隆堂

西山紫翠簇夫容師住逍遙第一峰慎勿挽弓思射鹿祇須鑄鐵學降龍閒穿曉月鉏靈藥醉拂秋風臥古松應憶京華舊遊處蓬萊坊畔五雲重

遊張公洞簡常守劉道中

赤鳥二載發空奇古洞深沈道路危翠竇下攢山瀑落紫巖中廊石膏垂鐵船通海時難遇金鼎調元事可期祇恐

使君同變化白螺來往少人知

題劉京叔歸潛室

獨構茅堂養道真滿前俗事罷紛紜
稽溪夜釣波心月汾曲春耕隴上雲
長笑熊羆勞應夢直教猿雀怨移文
近來傳得安心法萬壑松風枕上聞

攸寧菴

高興何如向子平男昏女嫁一身輕
白雲在望頻登隴黃髮爲期少入城
繭室已營身後計鳳笙時聽月中聲
江淮十載風塵滿回首誰應似獨醒

萬歲山次韻

萬歲仙山聳碧空廣寒春殿最當中
橋連綺石通三島路

遙銀河接兩宮柳拂甘泉巢翡翠花凝太液下其鴻年年
此地經遊輦自是承平樂未終

華素臺

銀臺錯落照長春泰宇清明絕點塵星斗九天分楚越山
河萬里界臨閩花邊絳節招猿鶴雲裏丹梯駐鳳麟戲馬
歌風何足數初陽今古對天人

張舍人遙碧樓

西北高樓入九天楚雲吳樹淨娟娟玉浮翡翠流青草金
削芙蓉列紫烟方圓尙蔽周典禮故家猶繼漢神仙想應
公子登臨處明月吹笙彩鳳旋

慶黃晉卿任江浙儒學提舉

憶昨追隨到上台，鼇頭先奪錦標回。道人獨竇龍鶩帖，天子曾驚倚馬才。禮以二儀宗太極，名因三賦重蓬萊。只今牧雨司吳越，絕勝文翁化蜀來。

大駕度居庸關

居庸雄據萬重山，南北門分作漢關。鼓角動時森虎衛，旌旗行處識龍顏。禪宮路轉風煙合，御苑春深草樹閒。待得長楊圍獵罷，又隨車騎此中還。

次韻王侍郎上都見寄

灤水東風淨物華，石磴峰下駐仙車。清明草檢歸黃閣，勝日閒遙近紫霞。萬戶砧聲聞別館，九秋天色落誰家。仙郎賦罷長回首，南去還乘八月查。

寄贈華陽洞隱者

歸去華陽古洞天，高情蕭爽絕凡緣。
蘿石壁書紅葉散，髮雲林臥紫煙長。
史王經何日降，隱居真訣至今傳。
江東却擬尋君去，合景同風問上元。

高遠堂

數椽茅屋雲中出，一抹青山坐上看。
讀罷黃庭春雨後，剗桐花落鳥聲寒。

贈聶尊師

青山寂寂雨瀟瀟，一個長松翠欲飄。
白髮道人年八十，小樓閒坐說前朝。

題雲林子南邨隱居圖

山高白石秀竹密綠陰濃牕映風光掃溪流月影重

簡高僉事堯臣

憲府開江左清風肅百曹朝廷任隱逸郡縣觀英豪必使
民情直須除吏弊牢馬周爲善政今古尙持操

送李理問赴嶺北省

君向龍沙去迢迢不計程關山殊漠苑河隴異秦城青草
明妃塚黃雲屬國營盛年經此地往事尙傷情
畫省聞邊鄙郎官選俊才臂鷹過鴈磧走馬上龍堆氣候
調中律星辰接上台何當瓜及日却向晉陵回

送黃元深游湖

南朝宮殿鎖蓬萊芳草春深夢不同只有海門青一點月

明猶送舊潮來

春盡北行留別吳大修撰

萬柳千花拂酒旗南陵北苑草離離
居庸關下泉鳴咽又是東風欲去時

次韻盧疎亭廉使見寄

西風吹老敬亭秋回首江雲近涿州
記得少年陪劍履麒麟閣上鳳池頭

鄧宇

宇字子方號止庵又號神樂方丈臨川逸民清壑
樵叟雪鶴山人臨川人出家上清宮

題錢舜舉秋江待渡圖

秋江已平秋葉黃有客待渡秋水長停橈切莫歌白苧白
苧歌成秋露涼鴻飛冥冥白日晚客心茫茫愁欲斷湘波
咫尺不可通何況精靈隔霄漢

題阮郛閬苑女仙圖

閬風元圃仙女居阮生寫作羣仙圖蒼松根老琥珀伏海
波突起珊瑚株翠樹瑤華分遠近細草若展青氍毹樓臺
回隱五雲表別有世界非堪輿仙姿縹緲各有態絕食烟
火餐瓊蔬兩仙拈筆點花露長者晏坐看琅書一仙倚石
閒摘阮一仙偃蹇披長裾其中一仙速相就珮聲微響如
雲趨羽扇雲環盡婀娜忽見龍鶴來天衢翩然復有一仙
至乘飈御氣三從俱我疑數仙天帝女帝旁暫別遊清都

俯視塵網中穢濁何紛如
人間光景疾如箭壺中日月無
居諸舞白鳳歌仙謠有耳只解聞雲韶
永超劫外何逍遙
紫陽真人慎勿驕
好當來迎共食瑤海桃

盧大雅

大雅貴溪龍虎山道士爲張伯雨所知有石臼
唱

姑蘇懷古

胥目懸門烏喙過至今哀怨入吳歌
山河不爲興亡改城郭
其如感慨何廢苑春深芳草滿
荒臺秋盡夕陽多
醉來一覺扁舟夢也勝豪華
逐逝波

題錢塘勝覽圖

南渡衣冠委草萊危亭高處海門開
雲霞都邑雄中國月露軒窗逼上台
春夢已隨流水去寒潮自領夕陽來
小樓題畫因惆悵豈獨昆明有劫灰

舟中寄張外史

權郎催踏春溪舫阻我辭君散木亭
江水未應春去漲鄉山偏向別時青
煙波釣艇新衝雨河漢仙槎舊犯星
輸與仙都老居士一簾山雨聽鶉經

追哭張伯雨外史

身似浮雲半在吳玉鈎橋外是西湖
花前微雨白鵝帖樓上好風金鴨爐
李泌只宜留北闕劉郎不得老元都
人情翻似東流水洗出青天一鳥孤

春晚

弱柳搖煙落絮輕綠陰初長小池平杜鵑處處催春急不
是東風太薄情

頂山

路轉青楓逕泉通古石橋規模靈隱小景象上方遙書壁
藤牽袂尋源草沒鐮每懷登覽日東海暮生潮

子游舊宅

列國雄吞際人材北學難淒涼吳邑里惆悵魯衣冠舊宅
歸蓬顯新祠倚杏壇一橋通夾巷蔽井樹陰寒

輓鐵崖先生

玉笙聲斷泣龍君撼樹虬蜉蝣謾作羣一代春秋尊正統兩

朝冠冕在斯文他年有約尋圓澤後世何人識子雲舊業
門生今幾在下車空拜馬陵墳

答王叔潤

天祿然褰嬾校經鵲舟隨處入鷗汀西風舉扇無王導東
海移家有管寧溪雨初晴雲更白湖霜未落草猶青客樓
寂寞江天外幾度遙瞻處士星

方從義

從義字無隅貴溪人上清宮道士書師高米游京
師最久頗負才尚氣衆目爲狂士而公卿大夫反
以是賢之老歸江南修道於金門之小洞天自號
方壺子又號不苦道人金門羽客

仿小米雲山圖

石路絕經過山雲自來去欲共麋鹿羣當在幽深處

題蒼頡作字圖

史蒼發天秘遂致鬼夜哭剝落石鼓文後世誰能續

陳士因

士因號虛舟貴溪龍虎山道士

隨侍天師真人游大滌

雲關如鎖路縈迴杖策追隨羽駕來松檜倚天青嶂合樓臺迎日碧窻開翠微亭好供吟筆丹盤泉甘稱潑醅萬里南歸游洞府脩脩滌盡世塵埃

張德老

德老號超然子貴溪人龍虎山道士

隨侍天師真人遊大滌次陳虛舟韻

玉京仙仗此徘徊得侍真人捧詔來
九鎖峰巒隨地轉五
雲樓觀自天開洞攢幽石成華蓋
香溢丹泉勝雪醅更上
危亭望天目客懷渾不著纖埃

李立本

立本貴溪龍虎山道士

壬午孟春游洞天

青山九鎖杳難登飽讀坡詩熟舊名
谷鳥喚晴千嶂曉巖
泉漱雨四時清雲根石老世方換
天柱峯高月正明嵐翠
春風瑤草澗直尋許郭問長生

陳據梧

據梧廬陵道士

游洞霄

吟老西湖處士梅又攜雲笠洞天來樓臺復此山中勝松
檜多因火後栽丹井一泓堪自酌青山九鎖爲誰開歆筇
讀罷坡仙句著意尋詩首重同

陳義高

義高號秋巖貴溪龍虎山道士

游大滌

神仙賜飲丹泉香晝引入洞藜燈光青童歡呼猿鶴舞擊
石奏樂鳴琳琅大哉洞天有真境滌我胸次冰雪涼擬來

學仙暫駐此因念親老思還鄉

翠蛟亭

流泉翠蛟舞神化遇坡翁得雨力轉健挾風聲更雄香涎
吹石沫飛勢下雲空要識池中物能施潤澤功

至元己丑再游

九鎖山圍紫翠堆日光霞彩照樓臺洞藏吠犬守丹竈泉
挾飛蛟吼晝雷峯頂樹高多寄草洞中石怪不沾苔雲璈
疊奏胎禽舞前度吟仙喜再來

呈郎一山舒桂林

仙家日月能久長嘯咏金闕歌天章嵯峨一山倚天勢桂
林萬古吹秋香丹泉泠泠漱夜月滌闌聳聳明朝陽巖翁

醉後星斗煥掀髯一任飛寒霜主人進酒添我興泰宇光明一心定當初稅駕吾不知卻見主人大明鏡

一庵題罷經千年我不得見真無緣丹泉泠泠漱玉潤琪樹挺挺含春煙翠蛟舞泉勢衝石白鶴振雪聲聞天我游空洞脫塵語玉皇領首誇詩仙

水仙巖

秋雨懸空風作寒淡烟鎖住屋頭山半巖飛鳥一聲疾峭壁斷崖千古閒俗子不知幽靜處神仙應在有無間夜來小艇曾分手醉把霜筠入翠灣

薛毅夫

毅夫字茂宏號鶴齋貴溪人學貞一之學隱居白

屋山繼至石田樂其幽勝首爲賦詩諸名公從而和之

毛道士石田山房

數畝依山宅一區喜存礪礪勝膏腴近因辟穀懷黃石也復耕煙種白榆玉氣潤多山水秀松雲飄盡鶴巢孤會當脫屣從師去乞取青櫺顆顆珠

答虞叔勝用文靖公韻

青城文思湧波濤子復長吟海上遊瞻望白雲歌伐木記從瑤島得餘桃百年風雅誰能繼萬里煙塵共此逃不是菊花知節序一杯負却蟹雙螯

張至常

以下明

至常字無爲號者山天師道陵四十三代孫洪武
初嗣真人職

聖壽賜宴奉天殿

天開萬壽正秋清百辟瞻趨感聖情金節擁雲來輦輦錦
袍曠日照階楹禮陳內饌香緘近樂奏宮韶喜氣明盛典
優隆垂奕世顧慚野服際恩榮

元旦早朝

五夜晨鐘啟禁幃仰瞻天闕曉雲齊掖垣趨珮香輿北阿
闕鳴鑣彩仗西雪色遠臨青瑣闥春光微動錦鞵泥盡祈
帝澤同甘雨河嶽增年感鳳棲

過蓮霞渡

小雨黃梅野齋香晚風數里踏春芳雲將山色渾收拾人
與溪流不住忙

題春江同泛圖

湖山翠黛照春明蕩漾晴波歇棹聲斜日槐陰同載處夕
湖鱸鱠片綸輕

張宇初

宇初字子璿貴溪人張道陵四十三世孫洪武十
年襲掌道教永樂八年卒建文時嘗坐不法奪印
誥成祖卽位復之著有峴泉集

題郭熙秋烟平遠圖

畫中五代俱匠師荆關董李稱絕奇河陽昔居秘閣內神

宗眷遇重一時手圖屏障遍官府古來籤軸不足數金壺
玉椀留墨香湘雲華岳生毫楮是時館一中百卷越世相
傳不多見劫灰一息江海空彩素因之昧高遠丹邱自是
蘇米徒此筆妙絕當時無風煙黯淡秋樹晚短橋斜屋行
人孤遠黛晴嵐隔墟里山村路暗寒鐘起僧舍人歸別水
津鳬鷺聲散漁歌裏河陽時在圭璧間意態落筆渾溪山
使人對畫欲絕世閑情倦思懷躋攀我思昔人今有年放
曠日已俱拋捐北苑林邱獲模寫猶好鍾陵僧巨然世傳
粉繪競妍醜澹冶神情蘊瓊玖歲寒枯淡見蒼森指顧風
標凌不朽滄洲元圃事莫期蔬食茅棟臨東菑霜林石磧
足栖逸賈公寧有冰鑑知晴牕展圖爲之惜落翼浮名在

編籍賞心獨憶雲林翁皓首從誰翫空碧

題王右丞雪霽江行圖歌爲陳無垢作

希夷之孫貌若仙臥雲不出動十年揮毫自比荆李輩舊
藏卷軸皆精傳王維此圖更幽絕漫空積雪愁雲天茆屋
誰家舊籬落前山後渚相縈磚袁安屋舍風正寒老木蕭
條榦盤錯放舟應有曉行者竹梅亞地溪聲惡烟霏漠漠
漁網靜亂絮飛花夜鳴薄尺圖景物興難盡小塢橋通足
深隱絕類君家象麓居龍湫石磴蛟蛇影瓊林柯葉冰欲
解飛瀑顛崖兩峯頂客來掃雲開畫門凍葉滑屨蓬簷溫
坐傾方薛試春茗故舊凋謝今誰存黃塵沸熱未清冷何
事酒廬燒竹根白頭偃臥意未倦會須共華山南村

題方壺寶晉雲烟圖歌

昔與奉常輩丹青耽妙年披圖且覽句撫慨心茫然壺仙
胸宇丹青府燕趙歸來隘吳楚襄陽逸法溯荆關海岳風
流雄萬古自緣宿契海岳情雲烟浩蕩窮滄溟山浮羣樹
清瀨遠雨洗半峰孤埵明濕嵐餘靄紛夏綠墅渚輕風散
鳬鶩移家願卜水雲均長竿獨倚清溪曲奉常高笠俊彥
流泮水橫經今幾秋鵝湖秀色賦真賞對此宛臥滄溟幽
畫意非苟精神情會應少落月秋空江海思浪擬浮槎度
林杪北海高風須力追清矜氣吐雲烟姿曹劉沈謝興莫
比溟鯤一躍凌天池

古硯歌蒼解性初高士

空峒山人居嶰谷擁翠成軒種羣玉生平好古陋流俗垂
釣揚江研山曲昔嘗投道袁安門立雪瑤臺書萬束珍圖
異玩皆絕奇雲錦爲囊善收蓄時來桂館聞鈞天握手論
交踰十年相知不怪有清癖每贈毛穎兼陳元石鄉雅製
來卽墨蘊質含章尤礪堅銘詞重是寶晉物枝蔓瓜瓞相
連綿南唐硯品每無價龍尾洮溪未容詫端歛猶推西北
巖青遍琅玕紫如赭襄陽本是南宮仙自許蘇黃堪並駕
海嶽巷前鍊觀城愛石應須拜其下駑駘過謂追名騷封
題遠寄滄江頭磨礪愈鈍鄙精銳體方用靜心與伴窮經
朝夕謾披寫臨池一掃春雲浮梧竹軒牕共清夜冰綃雲
霧騰蛟蚪京華苦惜久離別痼疾翻成臥松雪秦淮春漲

鱸思吳京口秋高潮夢越支離晚契松喬蹤價忝楊休賦
應劣願子空嗣壽與齊緩調笙鶴梅花月

題方壺真人洪景堂墨竹行

方壺子仙之徒烟霞烝度冰雪膚青年適志走燕趙胸吞
雲夢隘八區手調元黃仙掌露華岳崑溟肆吞吐貝闕金
門汗漫期照耀奎章渺三顧振衣便作江南歸江雨湖雲
春滿衣鶴髮仙翁愛蓬首丹光久與雲龍飛絕崖一咲天
地驚顛倒銀河橫玉繩狂瀾浩蕩作霖雨碧玉萬疊冷風
生人間謂竹總形似太陰黑入淵龍怒滄海揚塵壑劫空
此幅自是風雷護方壺子天與遊琅玕忽墮鳬仙裔鐵網
珊瑚銀漢秋平津劍躍尤神變夢斷釣天日華遠吳楚湖

山阮謝情簞簞翠黛平湖淺淇綰高堂意綿邈溪靄林靈
濕空廊夜聞天籟繞舍鳴惱我囊琴與鯨角浮生轉燭江
海空荒岡野渚喧寒蛩赤縣滄州不可圖坐聽落葉聲悲
雄欲假長竿釣秋水獨漱寒泉時洗耳浩歌漫有千古思
高臥空山紫蘿裏

擬古

朝陽生東樹微月流西岑清泉活活流好鳥交交吟春夏
氣候殊涼燠自駭尋美人崇蘭佩芳香襲衣襟邈然與世
隔空睇瑤華音響修曷爲言感慨投吾簪

養疾

濯足山澗中杖策曠乃還寒蛩鳴疎樹落日下西山灌園

露已濕倦息衡門間
寢室非苦疾鶉衣畏早寒
寧貽榮惠
謂齒落無衰顏

乙亥季夏還山居偶興

未夏熾餘暑幽期諧素衿
川源蔽繁綠溪渚澄深潄
田舍靜雞犬荒蹊抱深林
圓淵敞靈構疊嶂羅高岑
荷氣薄朝露魚波依重陰
披襟遂恬息濯澗清閑心
遺世非塵傲養真宜自任
秋風動早思寫我邱中琴

望吳山

吳越游程熟溪平驛路分
夕陽回浦樹秋色滿湖雲
曲澹船孤放淒風雁獨聞
浣花茅屋小別思夢紛紛

山行晚眺

縱目郊原趣依稀物候新溪寒回迆照林暝促歸人山逕
松陰雪漁家柳色春盡拋江海興期此坐垂綸

臥疾

養疾逢春盡庭除半草萊亂雲添夜雨驚鳥落殘梅濁俗
增膏火關心久木灰白頭非所待林臥絕塵埃

晚行

倦行偏旅思蔬味喜初聞野道堆黃葉人家住白雲鳥啼
斜照薄風急暮帆分歸策猶暄暖徒知縣世氛
苦疾嗟長道舟途總未安晚程逢雁少秋夢到鄉難魚腹
知河落鴈輕信水寬篙師時凍語不敢怪風湍

鵬月望夜

臘半宜陰凍青陽轉小和江梅春暖動霜月夜寒過霽雪
隨鷗盡朝雲逐雁多衰遲惟憫壑寧忘紫芝歌

野眺

山谷寒應早幽懷絕垢氛白波雙澗雨紅樹半坳雲啼鳥
欺新冷潛魚傍夕曛寂寥何所慰先哲有遺文

春暮自遣

林居休暇日春盡夕陽坡山近青嵐少池平綠草多隨風
巢燕定殘雨曉鶯和薄世情綠澹應慚逐逝波

柯江卽事

每愛柯江秀塵衿洗黛螺水流渾不盡山靜看偏多秋樹
連雲住漁篷載雨過何當無一繫釣瀨老烟波

春寒

好逕寧高尙栖遲若去官掃雲期晚霽臥雨惜春寒張說
文辭癖陶潛水木寬故人書少慰塵累了無干

月下夜行

官舸宵征上丹衷切帝畿水寒霜逼枕江靜月侵衣微火
村墟僻殘烟網罟稀山林衰倦久鷗鷺恆忘機

訪朋山如愚尊師榆原真館

榆晚高堂續構成獨橋雙澗步秋清牽籬野蔓殘花影遠
戶林塘過雨聲種術圃通黃葉路採芝人老白雲扃詠茅
擬傍朋山主且遂茅茨話拾荆

偶成

寥落文衿歎二髦倚空瀟氣渺秋毫樹雲分曉侵殘帙江
雨添涼入敝袍新沐尙應慚貢禹故書猶擬寄山濤無端
歲月催疎鬢笑指蘆花試小舸

聞霜鐘

霜滿瓊林度曉鐘月華流韻徹晴空投簪幾憶鴻鳴露歛
枕猶驚鶴唳風銀葉香消深館裏梅花調遠古城東十年
感慨成無寐應律音長豈世同

晚立

曉試春衫雨霧中半庭芳草濕殘紅杜鵑啼過斜陽去又
是樓頭芍藥風

感舊偶成

故朝臺館勢連空多在荒煙野水中愁煞蘆洲風急處寒
笳吹過暮城東

晚興

晚來山色翠芙蓉樹帶溪聲水接空自是江南春雨久柳
陰啼鳥棟花風

故園自適

過雨啼鶯著意聞晚香樓檻小桃春時光怪煞空歸去似
倚垂楊綰住人

社日雨

桑柘林中正雨肥誰家醉社板橋西風煙只老垂楊柳莫
遣梨花濕燕泥

春寒

煙雨聲中酒夢殘
靡蕪添綠又春闌
鶉鳩喚處西風急
白是楊花惹暮寒

聞鶯

綠陰垂地曉聞鶯
山雨溪嵐郭外情
正惱病懷無緒久
遠風吹作送春聲

四月三日赴演法觀視斷碑因賦

雨逐西風遍野溪
翠林深密石橋迷
杜鵑不識春歸盡
尙送餘寒著處啼

夏景

深院棋聲日正長
博山添火試沈香
道人鞭起龍行雨
帶

江西詩徵

卷九十一

建清

五

得東潭水氣涼

冬景

養就還丹不怕寒
獨騎黃鵠上雲端
笑談借得天家雪
散作琪花滿石壇

林復眞

復眞字剛伯常熟人
龍虎山道士預修永樂大典
有止庵集

送東白副綱還雲間

三年客裏惜居諸
此日功成貝葉書
幾度賜衣沾湛露
滿懷歸興載籃輿
山橫齊魯吟情好
月落秦淮鴈影疎
若過吳門頻問訊
故園松竹近何如

飛雲觀道士

南昌飛雲觀永樂間有一道士居小樓後不知所
之遺有飛雲福地書額及詩

飛雲觀詩

倚輿踏雪過凌虛夜宿琳宮聽曉雞簷鐸有無風逆順紗
宮明暗月東西鸛鶴聲中詩思遠瑞香花下夢魂迷冷冷
清清清到底一枝花萼助吟題

吳隱元

隱元自號琴樂翁南昌鐵柱宮道士

漁父詞

扁舟一葉蘆花外短笛數聲楊柳陰隔浦樓高看不見夜

分何處得相尋

周休休

休休正德間居建昌隆道觀

題院壁

陌上紅塵撲面飛
近來覺得世情微
白雲深處招黃鶴
不識人間有是非

汪麗陽

麗陽鉛山人嘉靖初武夷接筍峰道士遺蛻葬於
石壁有野懷散稿

答葉東林

柴扉終日對雲關
何事游人興未闌
一榻枕泉眠竹影
茶

烟初歇鷓鴣聲殘

李天麟

天麟安福人棲隱拱北觀得旌陽清淨之道日事
元修剛發真諦嘉靖六年天師錫銅印命爲都講
名公卿皆器重之朗吟羽化

羽化詩

紫仙山上聚羣仙共笑塵凡幾萬年隨處蓬萊人可到誰
云弱水浩無邊

謝允一

允一字樂齋安福人生而神異其母方娠夢神人
以玉環餽之生時左掌有丹砂紋七歲失怙特爲

江西詩徵

卷九十一

道流

聖

人牧牛一夕值雷雨陷深潭神引出之至元陽洞
外有老叟物色之授以內經秘典靡不豁然領悟
嘉靖中禱雨立應隣女爲狐祟用雷火殛之嘗詣
上清講法放遊名山水多題咏著有元陽正宗壺
山漫集

元陽洞

太古鴻濛闢闢奇蒼龍化作老松枝等閑尋得源頭水任
是秦人也不知

劉因海

因海字迪若號學山金谿人自幼好方外遊年十
七入龍虎山學道授上清宮提點嘗作歌云云

歌

山花幾本植岩前不與凡花爭後先
世界一壺藏日月雷壇嶺上看雲烟

張還初

還初洛陽人遊歷萬餘里居南昌與瑞昌王孫朱
議霧交最善忠義慷慨聞闖亂甚哭失聲欲舉義
不果後避地南昌東江卒霧遊寧都見壁間詩云
云又別書一行有君思江北春天否楊柳鵝黃戰
馬嘶之句

題寧都北門觀壁

秋嶺不空行擁被攤書讀寄語學道人毋徒享清福

李蓮雲

蓮雲武寧人性機警善談諧能詩日可數十首每
酒後悲歌激昂起舞與同邑汪澗最善後棄家爲
道士遇山水佳處則誅茅數月旋徙他所尤精醫
測人死生順逆每奇中聞貧兒旅客遭疾輒囊藥
就視富者延治多避不往

清明郊遊

白紙山山挂江流渺不同但聞新鬼哭那見古魂來

江西詩徵卷九十一